



Naalackersuisut 2021-mi Asiap Kangiani sinniisoqarfimmik pilersitsinissaq pillugu Inatsisartut aaliangiiffigisassaattut siunnersuut.

(Nunanut Allanut Nukissiuteqarnermullu Naalackersuisoq)
(Siullermeerneqarnera)

Demokraatit Nunanut allanut naalackersuisoq qutsavigerusuppaat Asiap Kangiani sinniisoqarfimmik pilersitsinissamik siunnersuutip peqqissaartumik piareersarsimaneranut.

Demokraatinut pingaartuuvoq, uagut nunatut nunarsuarmioqataaneq, nunarsuarmioqataanerullu periarfissiissutaasa atorluartuarnissaat. Pingaartuuvoq, uatsinnut mattutinnginnissarput, akertianilli nunarsuarmut isiginiarnissarput aammalu ammaffigalugu, sunik neqerooruteqarsinnaanerluta aammalu sunik tapersiinnaanerluta. Immitsinnut nittarsaattariaqarpugut pingaarutilinni politikikkut, aningaasatigullu niuerfinni.

Taamaattumik Demokraatit Islandimi, USA-mi EU-milu aallartitagut tapersersortuaannarpai, isumaqaratta, najuunnissaq aammalu niuerfinni tamakkunani uatsinnut nittaarsaannissaq pingaaruteqartuusooq.

Taamatoqqissaarlu isumaqarpugut, pingaaruteqartoq Asiami inissisimanissaq. Japanimi aammalu pingaarnertut kiniiserit niuerfiini ipput avammut niuerfiit annertungaatsiartut pingaartumik aalisagaatsinnut. Iluaqutaanngilaq isumaqassalluni, tamakku Nuummi allaffinniit aqussinnaagigut. Pinngitsoorata najuuttariaqarpugut.

Tamakku tungavigalugit isumaqarpugut, isumassarsiatsialaasoq pitsaasumillu aningaasaliinerussasoq Kinami Beijing-imi aallartitaqarfimmik pilersitsigaanni soorlu Nunanut Allanut Naalackersuisumit uani siunnersuutigineqartoq.

Taamatut oqaaseqarluta siunnersuutip Nunanut Allanut sillimaniarnermullu ataatsimiititaliamut suliareqqitassanngorlugu taperserparput.